

# Ɔwulú Gyankpapuá Paulo Lówanlín Sísí Timoteo

## Itsiáha

**1** <sup>1-2</sup>Mí Paulo ání aní Nkpa Ɖhópu Bulu mua Kristo Yesuá aní ansí dín mvsu lóbwε mí \*sumbí ɔɔɔpú, dé Ɔwulú ání wanlín sísí fú Timoteo ání fúgyi mí bí onutó Yesu hógyi amvɔ.

Aní Sí Bulu mua aní Wíε Kristo Yesu bogyíi fu buale, abuwun fu nwe ha fú iwilwii.

## Afunu Atosunáhé

<sup>3</sup>Bréá ndenatí ɔɔɔ Makedonia nsáintɔ á, nebláa fu mbée, futsía Efeso ɔmátɔ, afvka ahá ámúɔ bude afunu ató suná ámv itin. <sup>4</sup>Mú ɔma a, da amú ɔlá abusi bré yintá há ɔtewa pú anáin ulíntɔ kláa títítíntín. Nwéengyí keke utɔpúba. Itamahá ahá abvtsia nkpa Bulu hógyitɔ. <sup>5</sup>Tsá svá aniaa fvkáa amú itin gyí, alá Okristoyin okugyíɔku ɔbɔdwe mu ba, mu klvn méeha mu ipón, obénya agywun wankláán múa hógyi onutó. <sup>6</sup>Aku bumobuo ali ɔkpa ání. Mú sv bafwí yó bude asún ání uma así blí. <sup>7</sup>Budekléá ɔbwe Mose \*mbla asunápú, táme bumedeé utó ámúɔ budesuná ámv así nu. lde amú bwe fé buyin mú, táme bumeyín mú.

<sup>8</sup>Aniyin ání mbla ámv bu alé, ní ɔpúsúná ató ɔkpa wankláánsú. <sup>9</sup>Táme iwánkɩ aní ání megyí yilé abwepú sv Bulu lówa mbla ámv. Mboún ahá ání butamagyí mósú, ahá ání amú asvɔ bu amú ɔnlɩn, ahá ání butamanyá mu ifú, lakpan abwepú, ahá ání amú iwɩ métɩn, ahá ání butɔkpɔ́í

Bulu, ahá ání butómó amú akwúpú pú aha bambá, <sup>10</sup>mbua atópú, ayin ání butekle amú aba ayin pú atsiá butekle amú aba atsi, anyánpúsa ibiá agyípú, afunupu, ahá ání beká ntam butamagyi mósú pú tsiátósá umekanáa atosunáhé wankláán ámú <sup>11</sup>Bulu Onumnyampu, ikanfú gyi mu kle amu lópuhá mí óbée, ndáa mú ókan amu.

### Bulu Paulo Bvaleyí

<sup>12</sup>Nedá aní Wíe Kristo Yesu ipán ání alawá mí ówunlín, bú mí ónókwálupu óbée, nyóó agyómá ánfí púsum mu. <sup>13</sup>Teki míteblí mu iwí asun laláhe, ntedínká mu ahásu, súpá amú ní. Táme olowun mi nwe, tsúfé mmóhó mu gyi ali bré ámúto, mmeyín tósá ndebwe é. <sup>14</sup>Óo, hie ki aliá chíé óbu awítóle! Óleha mí nenyá mu hógyi pú mua mí abadweá ibu ania Kristonyó ukulebweto. <sup>15</sup>Asún ánfí ibu mótó, ilehián ání óhagyíóha óbóhó mósú gyi. Mógyí, Kristo Yesu léba óyító bele lakpan abwepú. Mígyí amútó ólaláhe ni. <sup>16</sup>Táme íni su Bulu lówun mi nwe, há Kristo Yesu léle mí ánfí ngyi lakpan óbwepú kpónkpónkpónti ánfí ní. Méni óhagyíóha óbébi ání Bulu tehié nyá klun há óhá ání óbéba bóhó mu gyi, nyá nkpa ání utamatá. <sup>17</sup>Mliha awa Bulu numnyam, akanfu mu aniaa, “Fúgyí Owíeá fú iwígyí tamamó ónó. Bulu Ókukúnú ókule, butamapú ansíbi wun fu. Fubu unu bré féé, futamawú! \*Amen.”

<sup>18</sup>Mí bí Timoteo, ató ámú Bulu léle súná tsú fú iwí ámu sú nde mbla ánfí wa há fú. Pú asún ánfí yó agyómá, afupuko atosunáhé wankláán ámu nwunsu. <sup>19</sup>Kita fú hógyito. Bwe tósá fuyin fú klunto ání ibu alé, tsúfé aku babwé tósá buyin ání ima ale. Mú su ilahá amú hógyi lawú. <sup>20</sup>Amútó aku gyí Himeneo mua Aleksandro. Napú amú wá Óbunsám ibito. Óbíti amú isu, méni bébiá mehián ání féblí Bulu iwí abususu.

### Bulusúm Mbla

**2** <sup>1</sup>Itósá ndedunká ání mlígyánkpa bwe gyí, mlíkóli Bulu ahá féé nwunsu, amlíto mpái ha amú. Mlíku Bulu ató

há amú, amlida mu ipán chagyícha nwunsv. <sup>2</sup>Ilehián ání mlóbwé mú alí há awíe pú ahande é, méni asuto bólwií aní, abétsiá iwilwiitɔ, atalí sum Bulu okpagyíokpasv. <sup>3</sup>Íni búv alé, aní Nkpa Ohóvu Bulu tekle ni. <sup>4</sup>Tsúfé odekléá obóho ahá féé nkpa, méni bébi okokwali amv. <sup>5</sup>Bulu okukúnú okule bu unv. Nsiné olapú okule pé é bu Bulu muva anyánpósa nsiné. Mogyí Kristo Yesu, ogyi nyankpósa amv. <sup>6</sup>Mulési mu nkpa há púho ahá féé nkpa. Asún ánti Bulu lópvhá oyi féé mú bré wankláántó ni. <sup>7</sup>Okokwali nde mli bláa, mmedé afunu wa. Íni sù Bulu léle mí obéé, mbwée mu asún okan odapú, mu sumbí oyopú pú osunápú ha ahá ání bumegyí Yudafó, mí ambla amú okokwali asún tsú Yesusu hógyi iwí ní.

<sup>8</sup>Ndekléá opasua kugyíkvɔ á, ayin ání amú iwí letun butsiú ibi fva bo mpái. Obí ntée nwéengyí mátsiá amútó. <sup>9</sup>Atsi ámu é budída tati okpa wankláánsú. Amú atɔ didáhé máwo ansíbi. Bumádun imi bwe, wá sika ató, didá atatiá ibv ibiá dubi. <sup>10</sup>Atsiá bee butenyá Bulu ifú bubwée yilé. Mú obéha bówa akíle ni. <sup>11</sup>Ilehián ání bétsiá así díín, ba iwiasí súan ató. <sup>12</sup>Mmókóhá atsi okpa mbéé, busúna ayin ató, ntée bugyí ayinsv. Mboún butsiá díín. <sup>13</sup>Tsúfé \*Adam Bulu légyankpá bwé asa okobwe \*Hawa. <sup>14</sup>Megyí Adam é \*Satan lémlé, mboún Hawa olemlé, okokusú líí Bulu mblasv. <sup>15</sup>Táme Bulu obóho otí nkpa tsun ikwísv.<sup>a</sup> Ní oletalí kítá mu hógyi pú mu abadwetɔ, olega mu iwí letun, oletsíá nkpa é wankláán.

### Opasua Ohande Bwe

**3** <sup>1</sup>Asún ánti bu mútó. Ní cha obwé agywun ání móbwé opasua ohande a, alakle agyómá wankláán. <sup>2</sup>Imehián ání olala bétsiá opasua ohande iwí. Obwée oka okule otsiápv, mu agywuntɔ da, otegyi iwísv, obú bu musv, otcho afó, otosúná ató é wankláán. <sup>3</sup>Omábwe nta obupú ntée ohá ání obv iyin. Obwée ohá ání oleba iwiasí, mu asún lolwií.

<sup>a</sup> 2:15 Tsvn ikwísv, ntée Tsvn mu abi kwíhészv. Idesuná ání Tsvn obíá otí ámu obókwiísv, ntée tsvn Yesu ikwísv.

Ɖmábwe ɔtrépu, ɔmábwe kóba ɔdwepu. <sup>4</sup>Ɖbwée ɔhá ání ɔteki mu wóyísú wankláán, mu abí beba iwiasi, butobú mu ɔkpagyókpasu. <sup>5</sup>Tsúfè ní ɔha méyín mu wóyísú kí wankláán á, nkálu ɔbétalí kí Bulu ɔpasua ámusu? <sup>6</sup>Ɖmábwe ɔhá ání ɔledamlí kluntɔ mɔkúwá ɔpá. Ní megyí ali á, ibéha mu obótsu iwí, Bulu ɔbébtí mu usu fé Ɖbunsám. <sup>7</sup>Ínu fée ɔma a, ilehián ání ahá ání buma ɔpasua ámutɔ kúráá bétí mu ɔdayilé. Ní megyí ali á, ɔbékpa wíé Ɖbunsám yibitɔ súpa.

### Ɖpasua Ɖhande Ɖbvápu

<sup>8</sup>Ɖpasua ɔhande ɔbvápu é ɔbwée ɔhá ání obú bu musu, ɔma nnonyo, ɔtamabú ntá, ɔma sika ɔnsípe. <sup>9</sup>Ilehián ání ɔbékitá hógyi asún ámúbú ilalun ɔwan ámutɔ wankláán, mu klun é méétrá ha mu ipón. <sup>10</sup>Mligyankpa pu agyómá iku wa mu ibitɔ, pusu mu kí beɛ ɔlala ma mu iwí, asa amlíha mu ɔbwe ɔpasua ɔhande ɔbvápu. <sup>11</sup>Ali kén mu ka<sup>b</sup> é ɔbwée ɔtsiá obú bu musu, ɔtamablí ahá iwí asun laláhe, otegyi iwíusu, ɔbu ɔnɔkwali tógyítótɔ ní. <sup>12</sup>Ɖpasua ɔhande ɔbvápu ɔbwée ɔka ɔkule ɔtsiápu, ɔtetálí kí mu abí pú mu wóyísú wankláán. <sup>13</sup>Ahá butobú ɔpasua ɔhande ɔbvápu ání ɔɔyɔ mu agyómá wankláán. Itehá mu ɔtetálí tóí tsú mu hógyiá ɔbu Kristo Yesutɔ.

### Asun Ɖjainhé Kpɔnkpɔnkpɔnti

<sup>14</sup>Nde ɔwulú ánfí wanlín sísí fú, táme ndun ansí ání nókɔsí ba usu. <sup>15</sup>Múmú ní nde ɔpá wa kúráá á, ɔwulú ánfí ibéha fébu tsiátɔ oduá ilehián ání ɔha obétsiá Bulu wóyí, igyi Bulu Ɖkɔnkpapu ɔpasua ámutɔ. Ɖpasua ámu gyí ɔtan pú ntswiasi kpékplékpée há ɔnɔkwali asún ámu ní. <sup>16</sup>Ɖnɔkwali, aní Bulusúm iwí asún ámúbú ilalun ɔwan ámu lómoní. Múgyí, Kristo<sup>c</sup> léle mu iwí suná fé nyankpusa.

Ɖje Wankíhé léle mu suná ání yilé ɔbwepu ogyi.  
Bulu-abɔpu bowun mu,

<sup>b</sup> 3:11 Mu ka ntée ɔpasua ɔhande ɔbvápu tsíhé    <sup>c</sup> 3:16 Bulu bu nwulú dada amu akutɔ.

ahá beda mu asún ɔkan súná ɔmá féé.  
 Ɔyító ahá bɔhɔ mu gyi,  
 Bulu lótsu mu ya ɔsúsú numnyamɔ.

### Afunu Ató Asunápó

**4** <sup>1</sup>Ɔɲe Wankíhé amu lahié lé blí ɔbéé, bré tráhe amuto á, aku bési Kristosu hógyi. Béyaa asu nú afunu ɔɲé asún pú \*ɔɲe laláhe atosunáhé. <sup>2</sup>Apinabwebí abwepú afunu ató asunápó anfi bugyi. Amú klun tamatráa ha amú ipón.<sup>d</sup> <sup>3</sup>Amúdé ahá hie beé, bukísi atogyihe ku, bumátsiá aká mba akúlu é ní. Táme Bulu onutó lóɓwe atogyihe amu, ání ahógyipvá babí ɔnɔkwali amu budáa mu ipán, abugyi. <sup>4</sup>Tógyítá Bulu léle bu alé. Mú su uma aléá abékisí koku. Ilehían ání abóhɔ kugyíku, dá mu ipán. <sup>5</sup>Tsúfé Bulu asún pú mpái ámúú anilabó wólí atogyihe amusu ámu lahá mú lamlí Bulu klé.

### Kristo Osúmpú Wankláán

<sup>6</sup>Ní fɔpú asún ánti tswi apió ámu ansító á, fɔɓwe Kristo Yesu osúmbi wankláán ání bapú hógyi amuto asún, pú atosunáhé wankláán ámu búlá fú, fude mútá. <sup>7</sup>Máyaa asu nú atsi dehen ɔte pú mba imotsú Bulu iwí. Mboún hie fú iwí, afusum Bulu wankláán. <sup>8</sup>Tsúfé ní fúde nyankpusa ɔyulúú anfi hie á, labi kpalobí ku bu mútá. Táme ní fɔpú Bulusúm híé fú iwí á, ibu alé dun. Tsúfé oyúla bu mútá há aní séi ánti antsie nkpa, pú nkpa ámúú ibéba amuto. <sup>9</sup>Asún ánti bu mútá, ilehían ání abóhɔ mú. <sup>10</sup>(Nkpa ánti sú amidé iwí laláa ɔɔ agyómá ɔwɔnlínsú), aní ansí dun Bulu Ɔkiankpapu, ogyi ahá féé Ɔlepú, títriu ahógyipu anfisu ní.

<sup>11</sup>Suna amú ató ánti, afuha amú abugyi músú. <sup>12</sup>Máha ɔhaa obu fú kebi. Mboún fú tótu, fú nkpatiátá, fú ahádwe, fú Bulu hógyi pú fú iwitún ibwée atosuanhe ha amú. <sup>13</sup>Ní mlefia a, bɔ mbódí afotsia kla Bulu asún suna amú. Da asún ámu ɔkan, afusuna amú ató alu yófun bréá néba. <sup>14</sup>Mákiná

<sup>d</sup>4:2 Amú klun labwé fé tsa bapú dátó wá ogyá, lé tó mú.

Bulu atokiehé ámúú ɔɔpɔhá fú tsun mu ɔɔsú atɔ́púsu, bréá ɔpasua ahande ɔɔpɔ ibi dínká fúsú amu. <sup>15</sup>Tsia bwe ínu aná, afusi iwɪ ha mú, ménɪ ahá bówun ání fúde nkpa yɔ. <sup>16</sup>Tsia kɪ fú tsiátɔ́ pú atosunáhé amu. Tomi bwe mú alɪ, ménɪ fɔ́hɔ fúa asún ámu anupú nkpa.

### Tsá Abóbwe Há Ahógyipu

**5** <sup>1</sup>Mákplɔn wa oyin dehen. Mboún tɔɪ bla mu asún fé fú sí. Kita nyasubi ámu fé alá fékítá fú apio yinhé. <sup>2</sup>Kita atsi dehen amu fé fú yín, afukita mbitebí ámu é fé fú apio tshé. Máwa amú mba.

<sup>3</sup>ɔpasua ámu bukú asurapúá buhíé buma ɔbuápɔsu. <sup>4</sup>Táme ní ɔsurapɔ ɔku bu abí ntée aná á, ha amú abubu tsá ilehián ání bégyankpá bwé há amú akwúpú ntée amú aná Bulusúm ɔkpasu, puka amú akɔ. Múgyí amúsú kɪ, tsúfé mútegyi Bulu ansí ní. <sup>5</sup>ɔsurapúá ɔhíé ɔma ɔhaa tɔpú ansí dínká Bulusu, tsía ɔɔ mpái ɔpa onyé, kúlí Bulu tsá ide mu hián. <sup>6</sup>ɔsurapúá mu kle gyí nkpagyí kotóó mú lawú asa ɔna ɔyítɔ́. <sup>7</sup>Bla ɔpasua ámu asún ánfɪ, ménɪ ɔhaa méeblí ɔsurapɔ ɔkuku iwɪ asun laláhe. <sup>8</sup>Ní ɔku mékɪ mu abusuanfɔsu, títriu mu wóyítɔ́ ahásu á, múmú aladámlí ɔma há hógyi amu. Ínu su mu lakpan dɔn ɔhá ání ɔmɔhɔ Bulu gyi.

<sup>9</sup>ɔsurapɔ oduá mu idá bétsiá asurapɔ adá ɔwulótɔ́ gyí, ɔsurapúá alahɔ tsú nfí aduesie púya, ɔɔwa ɔɔkwali há mu kulu.<sup>e</sup> <sup>10</sup>ɔbwéé ɔhá ání ahá buyin ání ɔɔbwe yilé, fé abísúki, afɔ́hɔ, olosúm Bulu ahá,<sup>f</sup> ɔɔbúa ahá ání bude iwɔsun wúun, ɔɔbwe agyómá wankláán kugyíku.


<sup>11</sup>Máwanlín asurapúá bumɔkúdan adá wá ɔwulú ámɔtɔ, tsúfé ní amú ɔwólɪ ihá amú ɔɔbwé agywun ání bélatsiá akúlu a, buméétrá talí súm Kristo ɔɔkwalisu. <sup>12</sup>Ínu íbéha bégyi pón, tsúfé batón amú ntam ání beka há Bulu. <sup>13</sup>ɔma a, butebí ɔwulɔyɔ wa, yíntá bré náti kí ahá wóyítɔ́. Megyí ɔwulɔyɔ wule, butemlí ahá iwɪ asún ablípú, náti wá ɔɔ ahá

<sup>e</sup>5:9 ɔsurapúá ɔmɔkúkiná okúlu kɪ. <sup>f</sup>5:10 olosúm Bulu ahá ntée ɔɔfwí ahógyipu ayabiasɪ.

asúntó, blí asún ání imehián ání bébli. <sup>14</sup>Ínu su ndekléá asurapu amú búmɔkúdan amu buwúna tsia akúlu kwu abí, abuki amú wóyísú, méni buméeha aní alupú<sup>g</sup> ɔkpa abubli aní iwí asun laláhe kuku. <sup>15</sup>Nde asún ánfí blí, tsúfé asurapu aku badámlí yó búbuo ɔbunsám dodo. <sup>16</sup>Ní Okristoyintse ɔku bu asurapu mu abusuantɔ á, ɔkú amúsú. ɔmási amú tswi ɔpasua ámusu, méni ɔpasua ámu bénya ɔkpa kí amúá buma ɔhaasu.

<sup>17</sup>Ilehián ání ɔpasua ámu béka ɔpasua ahandeá bude amú kpa akɔ wankláán, wá amú numnyam. Títriu amúá butɔbɔ mbódí Bulu asún ámu ɔkanda pú mú suná iwí. <sup>18</sup>Tsúfé Bulu asun wanlínhé amu ɔleblí ɔbéé, “Butamawá ɔnantswieá ɔde ayó da ɔnɔ íkan.”<sup>h</sup> Uletrá blí ɔbéé, “Agyómá ɔyɔpú buteká íkɔ.” <sup>19</sup>Ní ɔku ɔdá ɔpasua ɔhande asún súná fú á, máhɔ mú, nkéti fanú mú tsú ahá abanyó-abasá ɔnɔ asa. <sup>20</sup>Wa iyin wa ɔhande amú ɔde lalahe bwe ámu ɔpasua ámu ansító, méni atráhe bénya ifú.

<sup>21</sup>Nlí Bulu mua Kristo Yesu pú Bulu-abɔpu ání alalé ansító, nde fú hie mbée, fugyí asún ánfisu wankláán. Máki



“Butamawá ɔnantswieá ɔde ayó da ɔnɔ íkan.” (1 Timoteo 5:18)

<sup>g</sup>5:14 Ntée olupú <sup>h</sup>5:18 Deut. 25:4. Mú asi gyí, “Butamalé ɔkwén pú tɔ tsítsi ɔsɔlɔɔ.”

ɔhaa ansító ntée fúti futáto ki. <sup>22</sup>Mákɔsí tsíá yái ɔha ɔpasua ɔhande. Máwa ibi ɔha bambá lalaheweto. Ha fú iwí itun brégyíbré.

<sup>23</sup>Fú ɔmétɔ ɔ ɔ ámu su mátsiá nu ntsu wole, tsia nu ntá kpalobí-kpalobí.

<sup>24</sup>Aku lakpan mejaín. Mú su butɔkɔsí wun mú bítí amó ɔsu. Aku klé é lejaín, ɔma asa utelin ɔwan. <sup>25</sup>Alí kén yilébwe tamaɔjaín ní. Ní umɔkɔsí lun ɔwan kúráá á, utebelun ɔwan ɔma.

**6** <sup>1</sup>Ilehián ání nkɔpábiá bubu ɔpasua ámutɔ béhie bú amó awíe, méni ɔhaa mɔɔkpɔí Bulu mva aní atosunáhé amu. <sup>2</sup>Ilehián ání amúá amú awíe bubu ɔpasua ámutɔ bóbu amú awíe amu dun. Séi kúráá ilehián ání bóbu amú dun ni, tsúfé ahógyipu bugyi, butɔdwé amú é.

### Afunu Atosunáhé Pú Atonyahé Onutó

Íni aná gyí tɔá fusúna amú, afowa amú ateto-ɔnlun abubwe ní. <sup>3</sup>Ní ɔku lósuná atɔ laláhe ku, múa aní Wíe Yesu Kristo asun blíhé pú Bulusúm atosunáhé amu umená á, <sup>4</sup>idesuná ání ɔhá ámu dé iwí tsu. Omeyín tɔto, nwéenkpangyi labólá mutɔ. Múá itedáli tsu mútɔ gyí ɔnsípe, utré, isia pú agywun laláhe. <sup>5</sup>Asún ání imedéhián iwí nwéen ahá ánífi odu butenátí gyí. Amú agywun lawú, butamablí ɔɔkwali. Amú odu butosúsu ání Bulusúm igyi ɔkpa kuá fótson músú nyá iwí.

<sup>6</sup>Labi kpɔnkpɔnti bu Bulusúmtɔ ní tɔá anibu yaí legyi aní ansí. <sup>7</sup>Tsúfé anumɔpu tɔto ba ɔyítɔ, anuméetalí pú tɔtoɔto é náti. <sup>8</sup>Mú su ní anibu atogyihe pú atɔ dudáhé a, mliha mú kpán igyi aní ansí. <sup>9</sup>Ahá ání butekleá bunyáa atɔ á, ibwébwéébwé butekpá wíe ɔɔki pú ayibitɔ. Amú mimlála tekpá amú yówie iwɔɔsun múa lalaheto, hí amú. <sup>10</sup>Tsúfé kɔbadwe tɔpú lalahé kugyíku ba. Mú ɔma aku bagya alí, bafwí dali hógyi amutɔ, ulahá amú bude awireho tɔɔtɔɔtɔ gyí ni.

### Paulo Asún Tráhe

<sup>11</sup>Timoteo, fu mú á, Bulu ɔha fugyi. Mú su ha íni aná iwa ífó fú wá. Hie fú iwí, afubwe tɔá ida ɔkpa. Bɔ mbódí



afvha yilébwe, Bulusúm, hógyi, ɔdwe, klunya pú iwiasibá itsía fútó. <sup>12</sup>Kɔ hógyi ɪkɔ wankláán ámu. Fú ibi béda nkpa ámúú itamatá, Bulu obékie aní mú ɔma amu. Nkpa ánfí sù Bulu létí fú ní. Mú su fobwii ɔnɔ ahá tsɔtsɔtsɔ ansító, gyi fú hógyi iwí adánsɪ ní. <sup>13</sup>Nlú Bulu, ogyi tógyító nkpa ɔhapú mu Kristo Yesuá olegyi iwí adánsɪ wankláán Pontio Pilato ansító, nde fú hɪ, <sup>14</sup>mbéé, fukíta mbla ánfí féétó wankláán. Mási mótó kpéfun ekeá aní Wíe Yesu Kristo ɔbéle iwí ɔwan. <sup>15</sup>Bulu ɔkukúnú ɔkule amu ilehián ání abékanfú. Mu nkule pé gyí Otúmípu, awíe féétó Owíe. Mu ɔbéle Kristo súná bré wankláán ámúú mu onutó ɔlehɪ yái ámutɔ. <sup>16</sup>Mu nkule pé tamawú, otsie ɔwankíkpa ání ɔhaa tamatálí kpúkpe mánta mu. ɔhaa mókúwun mu kí, ɔhaa móowun mu é ekekeke. Mu kle gyí obú múa túmi bré féé! \*Amen!

<sup>17</sup>Bla ɔyí ánfítɔ iwí anyapú fɛɛ, bumátsu iwí. Bumápu ansí dínká kɔba anfi iméetsiá yó ánfísu. Mboún bupúvú ansí dínka Bulusu. Mutéhá aní tógyító abóponyá ansigyí ɔyí ánfítɔ. <sup>18</sup>Bla amú fɛɛ, bupúvú amú kɔba bwe yilé, amú yilébwe imoni. Busánki ibitɔ abukie ató. <sup>19</sup>Ní bude íni bwe á, bude atonyahé yái há bré ámúú ibá ámu. Amú ibi béda nkpa onutó ámu.

<sup>20</sup>Timoteo, kítá ɪtɔ ámúú Bulu lahá fú ámu wankláán. Asún ání uma asi, imosuná Bulusúm mádalɪ fú ɔnɔ. Máwa iwí mimlá nwéngyí ání itamasúná Bulusúmtó. Aku butɔwá afunu bɛɛ, asúnbi igyi. <sup>21</sup>Tsúfé aku batsun músú sí Kristosu hógyi.

Bulu ogyí mli buale.